

三慧經

僧祐錄云安公涼土異經今附北涼錄

佛常欲得三人一者信二者問三者行或有人但信不喜已作爲信不欲行爲喜有三亡一者不布施二者不行戒三者不定意當滅思想乃得道要在不念已滅思想色亦滅識亦滅心有所念是爲四所有對是爲想當有想當無想不離想當離不生想還就不出想當有想者謂道想當無想者謂無色想不離想者謂不離經行想當離想者當離生死想不出想謂無道想不出十二門還就者謂人生死便不得脫

身譬如地善意如禾惡意如草不去草穢禾實不成人不去惡意亦不得道人有瞋恚是爲地生蒺藜善意如電來即明去便復冥邪

念如雲覆日時不見已惡意起不見道

學者有苦不學者無有苦學者有苦譬如人田種當先犁去草穢便多得收是爲先苦不學者無有苦者譬如地不犁續自生蒺藜惡物是爲不學無有苦

行道第一可禁苦第二可禁樂二者不可禁苦四者不可禁樂能樂得樂便行道能苦得苦便行道有人行道得苦便畏生死能行道如是不可與樂有人得樂能行道意不苦如是不可與苦有人得樂能行道得苦亦能行道如是可與樂不可與苦有人得苦不能行道得樂亦不能行道如是當與苦不可與樂都有四求一者用身故求二者用願故求三者用癡故求四者用行故求人欲保身長壽是爲身求欲得豪貴妻子珍寶是爲願求祠

祀鎮厭欲從得福是爲癡求所行非法欲家
安隱得道是爲行求

人有三不可保一者喜意二者財寶三者人
命身亦可念亦不可念計身諸惡露是爲可
念意墮五樂是不可念善亦可念亦不可念
謂得道意是可念不可念者謂以得道意當
轉增上惡亦可念亦不可念有過自悔是可
念意起墮惡是不可捨念正念邪是爲惑不
別是非是爲癡惡有二事一爲本二爲利所
作行是爲本受行福是爲利除是便得道

貪護謂已得復貪念色爲貪止爲非一意滅
故護貪爲得道貪護爲墮生死已得復護故
爲貪護

樂食者謂歡喜飽念食者謂念三十七品經
便飽識食者謂樂法已隨痛痒爲裁求後復

念爲識求

一切世俗事皆屬身一切名字皆屬意一切
不犯皆屬戒除是無所有爲道一法復壞道
行謂不精進一法壞人謂慳貪

外惡因緣來向人不受爲忍自身作惡不出
爲辱已過去莫復念未來亦莫待

今見在當斷非人所有莫得憂一切有意皆
爲結

有善意亦忘有惡意亦忘復用三因緣故一
者不習念二者不數念三者不著意倒是三
事不復忘

墳七

十

從有可得無有不可得有是謂三十七品經
意生死意生死無有數所以覺者種忘故本
意欲坐行道十日不能竟十日前世福薄故
多福者欲十日坐行便得身不欲行用劣瘦

極故意不欲行不念死敗苦空故智慧有四
相一者聞善語便不轉二者已聽便受著意
三者已失常思惟念四者意已思惟念復重
問欲知其意倒是少慧

有五百人行道得定意恐復失之因取人令
殺人報言殺道人令我得重罪道人言如人
有怨家欲殺之不是身為是我怨家汝為我
殺佛言當殺意勿殺身

有道人得定意時野火燒之衣不燃人見之
謂是鬼便斫之刀斫不入用心一故不燒柔
輒故不入有道人得定意弟子呼之飯不覺
因前牽臂臂伸丈餘弟子大恐因取結之意
結不可復取解之師禪覺苦臂痛問弟子白
如是師言汝不解者誤折我臂人得定意柔
輒如綿在母腹中亦爾

續七

十一

有三因緣覺人無所知一者問不如對二者
不能問三者不能語

取要經要譬喻說人逢大水但當取珍寶去
人在世間但當取善意去

人所念不得道何以故不念道因緣有道因
緣能得道謂六波羅蜜安般守意三十七品
經是為道因緣

有五因緣可信一者信佛二者信法三者信
戒四者信經五者信善知識信是五事得道
語有四法一者直語二者分別語三者問語
四者止語直語者有默人隨道德因緣直說
分別語者為所以所受不諦當分別本末重
語說問語者人自意為是隨因緣問之即自
知止語者佛所不說亦不說

有四因緣問一者一切問二者分別問三者

問問四者止問一切世間非常苦空行道得安隱已說是爲應語是爲一切問若人來問眼事莫持耳往報是爲分別問若人持白物來言是黑物因持黑物問之見爲何等是爲問問若人來問道何類因報寒何等類若問意何等類因報風何等類若問無爲何等類因報空何等類是止問

有四顛倒一者非常人意已爲常二者已苦人謂樂三者萬物皆空人謂爲實四者非身貪已爲有身人墮顛倒如是常計常以苦爲樂以空爲實非身已作身人如是意便得道人意墮四顛倒故計是爲我身諦校計身中無所有已無所有便墮空已墮空便爲無身已無身便墮無爲人有四癡常著四顛倒一者萬物非常自以爲常二者天下皆苦人

續七

十二

時作樂三者天下空人以爲有四者身非身不可保人已爲身五者月始生時拜六者十五日盛明時反踞視之七者女小時從人抱八者女大不可得見有四貴亦有四賤一者道貴人賤二者珍寶貴人賤三者官位貴人賤四者黠貴癡賤

阿難言人得善知識爲得佛半佛言人得善知識爲得佛道善知識難得何謂爲道德信爲道制身口意爲德人當有三知識一者富家二者事貴三者事大尊者以布施是爲富家以持戒爲事貴者守意念道爲是事大尊者有內治生外治生索錢財諸珍寶是爲外治生守意念道是爲內治生人不能自伏意反欲伏他人意能自伏意他人意悉可伏有內力有外力有內色有外色有內識有外

識能制惡意是爲內力力能有所作舉重瞋
恚是爲外力痛痒思想生死識是爲內色地
水火風空是爲外色意念爲內識眼見爲外
識有四事大難一者與得道人共會大難謂
十二賢者二者聞經入心難謂在八難處三
者如本觀難謂墮四顛四者如法行難謂不
能持戒

續七

十三

有五事求道大難一者年老二者疾病三者
縣官四者盜賊五者飢渴是爲五事求道大
難

有五事難一者值佛世難二者聞經難三者
得善師難四者得善人難五者得作人難
有五難一者貧能布施難二者豪貴能忍辱
者難三者有事對吏不欺者難四者與端正
女人同牀意不亂者難五者制人命不得傷

害者難

有七難一者受經能問難二者聞經解意難
三者與多智人對話能自解難四者自教復
能教人者難五者自安隱亦令人安隱難六
者已自定意亦令人定意難七者常不離法
至得佛道難

有十八事人於世間甚大難一者值佛世難
二者正使值佛成就得爲人難三者正使成
得爲人在中國生難四者正使在中國種姓
家難五者正使在種姓家四肢六情完具難
六者正使四肢六情完具有財產難七者正
使得財產得善知識難八者正使得善知識
智慧難九者正使智慧謹慎心難十者正使
謹慎心能布施難十一者正使能布施欲得
賢善有德人難十二者正使得賢善有德人

往至其所難十三者正使往至其所得宜適
難十四者正使得宜適聽問難十五者正使
受聽問說忠正難十六者正使忠正解智慧
難十七者正使得解智慧能受深經難十八
者正使能解深經復重難是爲十八事人於
世間大難

增七

十四

有八處人佛無那何一者瘧人二者聾人三
者地獄中人四者餓鬼中人五者畜生中人
六者邊地不知法義七者長生二十八天上
八者受不精進行是爲八處人佛無那何況
有五百人自說言我善佛言汝審善當隨我
後人言諾佛便行入火中五百人皆止住無
敢隨者言善人至難得

有人問佛佛教人作善何等益佛言天下人
惱我故教之耳人復言人有心當恣之佛言

坐天下人恣心故我止住百劫乃得佛道道
有七事一者意喜布施不欲餘二者但欲聞
三者但信四者但持戒五者但欲行六者欲
學慧七者但欲脫去佛在世時得脫轉後世
但學慧復轉後世但欲行復轉後世但持戒
復轉後世但信復轉後世但欲聞復轉後世
但欲布施不但布施當復聞不但聞當復信
不但信當復持戒不但持戒當復行不但行
當復慧不但慧當復脫去是七事當并行
有五叢殘世一者上世人長壽今世人短壽
二者上世人端正桃華色今世人醜惡三者
上世人多得道今世人不能得四者上世人
博達通知經要今世人不能通知五者上世
人安隱今世人多疾瘦是爲五叢殘世
有長壽者道人大富財產無數好作布施有

增七

十五

人言卿作布施大多道人報言我從佛聞人在世間往來生死其日不可數今我所有布施尚不能日用一錢何以爲多佛說人得一切天下珍寶不如聞佛一言何以故徒多財產不能離世間故山中揭鳥尾有長毛毛有所著便不敢復去愛之恐拔覆爲獵者所得身爲分散而爲一毛故人散意念財產財產不得脫苦用貪婬故人治生譬如蜂作蜜採取衆華勤苦積日已成人便竊取持去亦不得自食適自疲極人東走西走求是作是合聚財寶勤苦不可言已命盡他人得其財身反得重罪受苦不可量人在世間譬乘泥船渡河當浮渡船且壞人身如泥船不可久當疾行道

金有四試一者燒二者磨石三者鍛四者鍊

譬喻人亦有四試一者燒二者共從事三者色四爲制不止

欲得人相有四因緣一者與共居二者共居當久三者當共語言四者共可以知之

有四因緣知爲道人一者聞惡亂意即時轉念二者不說人惡三者自不墮論議四者能自護如是知爲道人自護

今世四因緣乃受福一者有處二者有時三者業四者師人有所止得安隱如意是爲處如人年三十當富十五時求不可得至三十

續七

十六

乃得是爲時若人宜賈白珠亦餘物從得利是爲業遭得明人分別說經心即開解是爲師有兄弟三人各自謂高健無輩共更持夜二兄居前卧小弟便獨坐有一蟲名爲不吉來嚙其髀弟便以手指之蟲便長大復捶益

大其人嗔恚取蟲蹴蹋自致疲極蟲益大不止其人便止休一夜已竟便呼仲兄起蟲復啗之兄復如小弟與共鬪蟲更長大至屋如是疲極復止休二夜竟便呼大兄起坐蟲復啗之大兄便持手指摩娑蟲復起兄生意以養覆之須臾極蟲便出養去至明日二弟極不能復起兄知二弟與蟲共鬪便問何以不起二弟慚不敢語兄言與蟲共鬪劇耶弟言然兄語弟言後儻有不吉蟲來但以養覆之不啻指也譬喻如癡人得對便瞋恚從得罪如弟與蟲鬪自致疲劇黠人見對來便避之是得福譬如養覆不吉蟲去

昔有道人爲國王說經王言佛在世多人得道今同說佛經人不得道佛爲持道法去耶道人言譬天下極美不過蒲桃酒飲一升便

十七

可醉持一升水澆一升酒中飲之不能復醉佛在世時說經知人意態譬如人飲一升酒便得醉今我輩不知是佛說經知人意態應病與藥故人多得道

有國王飯諸比丘天來指示王言是人得阿羅漢是人得菩薩是人得道迹是人持戒王悉覺知持心正等無有異意諸天代其歡喜有國王與人共爭高價浴佛王輒舉高價不止人言今我悉持所有財物妻子自身爲奴婢以浴佛王便不得

阿育王作八萬塔臨死欲絕時菩薩阿羅漢有五百人共守護更爲說經不使諸夫人得近與相見欲令王上天故

有小國王常起征伐大國王思惟言亡身得惡皆從貪愛故我不如以國與之大國王捨

國去作白衣在他國久後歸故國有人白言
王便勅左右往捕取殺之臨當死時呼其子
囑一言慎勿忘也汝勿念怨家惡當慈心

有國王治行不平冤枉人民受取非法天爲
雨不時節有女人言天雨不時節王治行不
十正故王已聞知便呼女人令請雨以三器
著地女人願令雨降中央器中復令從一頭
起則如其願王問何因緣得是女人自言我
至誠故佛言有地乃有萬物人有至誠乃有
道有國王出行見一女人端正無比王意欲
殺其夫取是女人傍臣言不當殺當享之國
王享其夫以金指鐲與之語言忘鐲者殺汝
王私呼婦令盜取鐲已後王呼問其夫鐲所
在夫求不知處便勅臣殺之令美飲食夫恐
不敢食人言卿當死何不食夫適欲噉魚因

續七

於魚腹中得鐲是至誠所致

有道人貧窮舉十萬錢用治生便先持三萬
布施持餘錢行賈途中爲賊所抄王便以珍
寶物凶與之有大囊小囊餘人各取大囊去
道人自念言我錢少不宜取大囊便取小囊
去其中悉有白珠賣得六千萬用至誠不貪
故得是珍寶

昔有國王徵國中諸盲人令於象廐中觀象
中有持象足者中有持象鼻者中有持象耳
者中有持象尾者去後共相問象何等類持
象足者言象大如柱持象鼻者言象如繩索
持象耳者言象如簸箕持象尾者言象如大
帚皆共諍之盲人各自信其意譬如人各見
少所經不達其法自謂大解亦如是
有國王於城外大作伎樂戲舉國中人民皆

出行觀城中有一家其父有疾不能行步家室共扶將令行言出城便止樹下不能自致語家中言汝自行觀來還乃持我歸時天帝釋化作一道人過其邊便呼病人汝隨我去我能令汝病愈人聞之大喜便起隨行釋將

積七

十九

上天至宮見金銀好物甚衆多欲從求之人言勿得可求勾瓶病人因前到釋所言我欲去願持此瓶勾我釋即與之語病人言中有物在汝所願病人持歸室家相對探之轉得心中所願金銀珍寶恣意皆得大會宗親諸家內外共相娛樂醉飽已後因取瓶跳之我受汝恩令我富饒跳踢不止便墮地破之不求不復得

世間有點人多無數未有如彌勒者彌勒尚復行學不厭何況餘乎佛已得道坐行安般

守意佛言我從無數世以來學不厭乃得佛後世人學當那得佛道

以持戒不復作惡有不信意故復犯戒便墮地獄閻王問之便對言我不作惡閻王復問汝不作惡何爲是中

有尊者爲賊人所折辱有人言何以不殺之尊者言我人客未具故人復言我爲卿屈人客尊者言不也我兵今自具如是二十餘歲殺賊人彼病死入復言卿不殺之今反自死尊者言我兵馬已具何故癡人當入地獄是爲兵馬具

問曰何等爲能知一萬事畢報曰一者謂無意無念萬事自畢意有百念萬事皆失

有道人夜行前未得道人隨其後後人有疑悔前人舉手五指頭出火復以鑰開戶後人

乃覺悟知爲道人

說經有六衰有人言七衰屋舍衰獨非衰耶
佛謂人言我復饒汝一衰癡爲大衰何以故
人說身事反說屋舍是爲癡

有人墮海中有人教食水盡可得步出人言

我已飲後水復來世俗如是前後相趣不可

極

人欲相見有四緣一者其人端正故二者宿
命相愛三者名聞四者欲聞深經安爲知是
隱爲自藏自藏者不見惡態

世間凡有千八道佛一切已知前世皆已學
從是不得道故索知

問人語時聲先生耶意先生乎報意先生何
以意覺聲聲不能覺意故

有人持珠度海失亡其珠人便持木斗甬水

棄岸上海神言汝當何時盡是水人言生死
棄之不置海神知其意出珠還之

三慧經